

Ghafur minta penjelasan presiden LDP
Malaysiakini.com
August 30, 2010

Presiden Parti Liberal Demokratik (LDP) Datuk V K Liew hari ini diminta menjelaskan kenyataan timbalannya Datuk Chin Su Phin yang tidak lagi boleh bekerjasama dengan Ketua Menteri Sabah Datuk Seri Musa Aman.

Ketua Umno Bahagian Kalabakan Datuk Abdul Ghapur Salleh berkata penjelasan Liew perlu bagi menentukan sama ada kenyataan Chin itu merupakan pandangan peribadi beliau sendiri atau pendirian LDP.

"Jangan jadi parti rojak dengan membiar segala kenyataan yang membabi buta menghentam pengerusi BN. Di manakah setiakawan dan sifat perundingan di meja bulat.

"Tidak wajar beliau (Chin) melahirkan kenyataan yang boleh mendatangkan kekeliruan dalam BN. Seharusnya LDP menyokong pemimpin negeri bukan menghentam membabi buta," katanya dalam satu kenyataan di sini.

Sebelum ini, Chin dilaporkan berkata beliau tidak lagi boleh bekerjasama dengan Ketua Menteri Sabah Datuk Seri Musa Aman namun tetap setia dengan BN dan akan terus bekerjasama dengan Umno.

Ghapur berkata sekiranya kenyataan berkenaan merupakan pandangan peribadi Chin, maka Liew perlu mengambil tindakan tatatertib.

"Semua orang boleh memberi pandangan tetapi biarlah berasas dan bukan kerana rasa tidak puas hati, pucuk pimpinan BN diperkotak katik oleh orang BN sendiri," kata Ghapur.

- Bernama

Copyright © 1999-2007 Mkini Dotcom Sdn. Bhd.
Source : <http://www.malaysiakini.com/news/141444>